

Na osnovu člana 19. stav (1) tačka a) i člana 20. Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17), Upravni odbor Agencije za bankarstvo Federacije Bosne i Hercegovine na sjednici održanoj 27.12.2017. godine donosi

STATUT AGENCIJE ZA BANKARSTVO FEDERACIJE BOSNE I HERCEGOVINE

I. OSNOVNE ODREDBE

Član 1.

Agencija za bankarstvo Federacije Bosne i Hercegovine (u daljem tekstu: Agencija) je osnovana radi uređenja, kontrole i nadzora (u daljem tekstu: supervizija) banke, bankarske grupe, razvojne banke, mikrokreditne organizacije, lizing društva, faktoring društva i druge finansijske organizacije za koje je zakonom propisano da posluju pod nadzorom Agencije (u daljem tekstu: subjekti bankarskog sistema), sa osnovnim ciljem očuvanja i jačanja stabilnosti subjekata bankarskog sistema i zaštite deponenata, radi unapređivanja njihovog sigurnog, kvalitetnog i zakonitog poslovanja, te da kao organ za restrukturiranje banaka vodi postupak restrukturiranja i oporavka banaka, u skladu sa Zakonom o Agenciji za bankarstvo Federacije Bosne i Hercegovine (u daljem tekstu: Zakon).

Član 2.

Statutom Agencije (u daljem tekstu: Statut) se uređuju:

- a) pravni status, naziv i sjedište Agencije,
- b) ciljevi poslovanja i nadležnosti,
- c) organizacija i način poslovanja,
- d) organi, njihova nadležnost, ovlaštenja i odgovornosti,
- e) nadležnost zaposlenika sa posebnim ovlaštenjima,
- f) organizacija, način rada, djelokrug i odgovornost odbora, komisija i ombudsmena za bankarski sistem,
- g) sredstva, prihodi i rashodi Agencije,
- h) planiranje i izvještavanje,
- i) sistem internih kontrola,
- j) interna i eksterna revizija,
- k) poslovna tajna,
- l) akti Agencije i način objavljivanja,
- m) druga pitanja od značaja za rad Agencije.

II. PRAVNI STATUS, NAZIV I SJEDIŠTE AGENCIJE

Odjeljak A. Pravni status

Član 3.

- (1) Agencija je Zakonom utemeljena kao samostalna, nezavisna i neprofitna organizacija kojim je uređen: status, nadležnost, organizacija, finansiranje i rad Agencije.
- (2) Agencija ima svojstvo pravnog lica osnovanog Zakonom i za svoj rad odgovara Parlamentu Federacije Bosne i Hercegovine (u daljem tekstu: Parlament).

- (3) Agencija može imati podružnice izvan sjedišta Agencije, o čemu odlučuje Upravni odbor Agencije za bankarstvo Federacije Bosne i Hercegovine (u daljem tekstu: Upravni odbor).

Odjeljak B. Naziv i sjedište Agencije

Član 4.

- (1) Puni naziv Agencije je: Agencija za bankarstvo Federacije Bosne i Hercegovine.
- (2) Skraćeni naziv Agencije je: FBA.
- (3) Puni naziv Agencije na engleskom jeziku je: Banking Agency of the Federation of Bosnia and Herzegovina.
- (4) Sjedište Agencije je u Sarajevu.

Član 5.

- (1) Agencija ima pečat okruglog oblika promjera 50 i 25 mm, koji u koncentričnim krugovima ima ispisan tekst: Bosna i Hercegovina, Federacija Bosne i Hercegovine, Agencija za bankarstvo Federacije Bosne i Hercegovine, Sarajevo, u sredini pečata (kruga) se nalazi oznaka rednog broja pečata.
- (2) Pečat podružnice sadrži isti tekst kao i pečat Agencije uz dodatak riječi "Podružnica" sa imenom mjesta sjedišta podružnice.
- (3) Agencija ima štambilj koji služi u unutrašnjem kancelarijskom poslovanju Agencije.
- (4) Agencija može imati i žig za plombiranje promjera 15 mm koji sadrži sve podatke kao i pečat.
- (5) Broj, način upotrebe, čuvanje i zaštitu pečata, štambilja i žiga propisuje direktor Agencije.
- (6) Agencija ima zaštitni znak Agencije, koji se ističe na poslovnim aktima, memorandumu i poslovnim prostorijama.
- (7) Odluku o izgledu, zaštiti i načinu upotrebe zaštitnog znaka, kao i odluku o promjeni izgleda zaštitnog znaka donosi Upravni odbor.

III. CILJEVI POSLOVANJA I NADLEŽNOSTI

Odjeljak A. Ciljevi poslovanja

Član 6.

Osnovni ciljevi Agencije, kao nosioca javnih ovlaštenja koja ostvaruje pod uslovima i na način propisan Zakonom i drugim propisima Federacije Bosne i Hercegovine su:

- a) očuvanje i jačanje stabilnosti i konkurentnosti subjekata bankarskog sistema;
- b) zaštita deponenata;
- c) unapređenje stabilnog i zakonitog poslovanja subjekata bankarskog sistema, kao i sistema u cjelini;
- d) supervizija subjekata bankarskog sistema;
- e) restrukturiranje banaka.

Odjeljak B. Nadležnosti Agencije

Član 7.

- (1) Nadležnosti Agencije su:
 - a) utvrđivanje i provođenje aktivnosti i mjera radi očuvanja i jačanja stabilnosti bankarskog sistema,

- b) utvrđivanje, provođenje i nadzor pravila sigurnog i opreznog poslovanja kojima se uređuje rad subjekata bankarskog sistema,
- c) izdavanje i oduzimanje dozvola za rad i drugih odgovarajućih akata subjektima bankarskog sistema kada je za to ovlaštena posebnim propisima kojima se uređuje njihovo poslovanje i Zakonom,
- d) supervizija poslovanja subjekata bankarskog sistema kada je za to ovlaštena posebnim propisima kojima se uređuje njihovo poslovanje i Zakonom,
- e) supervizija poslovanja razvojne banke, nalaganje supervizorskih mjera i druge nadležnosti u skladu sa propisom kojim se uređuje poslovanje razvojne banke i Zakonom,
- f) nalaganje mjera nadzora i druge nadležnosti, kada je za to ovlaštena posebnim propisima,
- g) donošenje akata kojima se uređuje rad Agencije,
- h) donošenje akata kojima se uređuje rad subjekata bankarskog sistema,
- i) donošenje akata, supervizija i poduzimanje potrebnih mjera u vezi sa sprečavanjem pranja novca i finansiranja terorističkih aktivnosti koje se odnose na subjekte bankarskog sistema u saradnji sa nadležnim organima i institucijama u oblasti sprečavanja pranja novca i finansiranja terorističkih aktivnosti, a u skladu sa propisima kojima se uređuje sprečavanje pranja novca i finansiranje terorističkih aktivnosti,
- j) donošenje akata i obavljanje poslova zaštite prava i interesa korisnika finansijskih usluga u bankarskom sistemu, vršenje nadzora nad primjenom propisa iz ove oblasti i poduzimanje drugih aktivnosti i odgovarajućih mjera u okviru svojih ovlaštenja,
- k) donošenje i ažuriranje plana restrukturiranja, utvrđivanje ispunjenosti uslova za pokretanje postupka restrukturiranja banaka, provođenje postupka restrukturiranja, odlučivanje o instrumentima i mjerama koje će se poduzeti u restrukturiranju i obavljanje drugih poslova u vezi sa restrukturiranjem, u skladu sa zakonom kojim se uređuje postupak restrukturiranja banke,
- l) provođenje drugostepenog postupka u skladu sa Zakonom,
- m) druge nadležnosti u skladu sa Zakonom i drugim propisima.

IV. ORGANIZACIJA I NAČIN POSLOVANJA

Član 8.

- (1) Agencija svoju nadležnost obavlja u okviru organizacionih jedinica: direkcija Agencije, sektori, samostalni odjeli, odjeli, uredi i službe.
- (2) Organizovanje rada Agencije, njena unutrašnja organizacija, način rada, opis poslova, broj izvršilaca, uređuje se Pravilnikom o unutrašnjoj organizaciji Agencije i Pravilnikom o sistematizaciji poslova Agencije.

V. ORGANI I NJIHOVA NADLEŽNOST I ODGOVORNOST

Član 9.

Organi Agencije su:

- a) Upravni odbor i
- b) Direktor i zamjenik direktora

Odjeljak A. Upravni odbor

Član 10.

- (1) Organ upravljanja Agencijom je Upravni odbor.
- (2) Upravni odbor ima 5 članova, koje nakon provedenog javnog konkursa imenuje Parlament na prijedlog Vlade Federacije Bosne i Hercegovine (u daljem tekstu: Vlada), koji se imenuju istovremeno na period od 5 godina.
- (3) Za člana Upravnog odbora može biti imenovano lice koje ispunjava uslove iz člana 18. Zakona.
- (4) U slučaju da Parlament nakon isteka perioda na koji je imenovan Upravni odbor, ne imenuje članove Upravnog odbora, postojeći članovi nastavljaju obavljanje svoje dužnosti, sa svim pravima i obavezama, do momenta kada Parlament izvrši novo imenovanje u skladu sa Zakonom.
- (5) Predsjednika, kao i zamjenika predsjednika bira Upravni odbor iz reda svojih članova.
- (6) Upravni odbor je za svoj rad odgovoran Parlamentu.

Član 11.

- (1) Upravni odbor donosi odluke iz svoje nadležnosti većinom glasova od ukupnog broja članova Upravnog odbora.
- (2) Sjednice Upravnog odbora održavaju se po potrebi, a najmanje jednom u tri mjeseca.
- (3) Način rada, sazivanja i održavanja sjednica propisuje se poslovníkom, koji donosi Upravni odbor.
- (4) Sjednicama Upravnog odbora obavezno prisustvuju direktor Agencije i zamjenik direktora.
- (5) Na sjednice Upravnog odbora pozivaju se direktor Agencije za osiguranje depozita u Bosni i Hercegovini i direktor Agencije za bankarstvo Republike Srpske, osim kada se razmatraju unutrašnja pitanja Agencije.
- (6) Lica iz stava (4) i (5) ovog člana prisustvuju sjednicama Upravnog odbora bez prava glasa.
- (7) Upravni odbor odlučuje o pravu na naknadu za prisustvo i učešće u radu na sjednicama lica iz stava (5) ovog člana.

Član 12.

U okviru svoje nadležnosti Upravni odbor:

- a) donosi Statut Agencije,
- b) donosi Pravilnik o unutrašnjoj organizaciji Agencije,
- c) donosi Pravilnik o plaćama i drugim materijalnim primanjima zaposlenika Agencije,
- d) donosi opće akte kojima se regulira poslovanje subjekata bankarskog sistema u skladu sa posebnim propisima kojima se uređuje njihovo poslovanje;
- e) donosi Pravilnik o poslovnoj tajni,
- f) donosi akt kojim propisuje uslove i način polaganja stručnog ispita za obavljanje poslova supervizije,
- g) donosi akt, kojim se utvrđuje visina naknade (tarife) za obavljanje poslova iz nadležnosti Agencije,

- h) imenuje i razrješava članove Drugostepene komisije, Odbora za superviziju, Odbora za restrukturiranje, Ombudsmena za bankarski sistem (u daljem tekstu: Ombudsmen),
- i) poduzima mjere kojima se osigurava odvojeno rukovođenje poslovima nadzora poslovanja finansijskih subjekata bankarskog sistema i poslova restrukturiranja banaka, njihova organizaciona razdvojenost i sprečavanje sukoba interesa, te međusobna razmjena informacija neophodnih za izvršavanje određenih nadležnosti,
- j) imenuje eksternog revizora,
- k) donosi opće akte kojima se uređuje način rada i nadležnosti Drugostepene komisije,
- l) donosi opće akte kojima se uređuje način rada i nadležnosti Ombudsmena,
- m) donosi godišnji program rada Agencije,
- n) usvaja finansijski plan i finansijske izvještaje Agencije,
- o) donosi odluku o investicijskim ulaganjima iznad 50.000,00 KM,
- p) usvaja izvještaje koje Agencija sačinjava prema članu 50. Zakona, koji uključuje izvještaj o radu Ombudsmena,
- r) donosi odluku o visini posebnih rezervi Agencije,
- s) donosi Poslovnik o radu Upravnog odbora,
- t) donosi odluku o promjeni poslovne adrese u sjedištu Agencije,
- u) donosi i druge akte u skladu sa Zakonom i ovim Statutom.

Član 13.

- (1) Član Upravnog odbora ima pravo na naknadu za svoj rad u Upravnom odboru, kao i naknadu ostalih troškova vezano za prisustvovanje na sjednici.
- (2) Visinu naknade utvrđuje Upravni odbor, u skladu sa članom 27. stav (1) Zakona.
- (3) Ugovor sa članovima Upravnog odbora, u ime Agencije, potpisuje direktor.

Član 14.

- (1) Predsjednik i članovi Upravnog odbora mogu biti razriješeni prije isteka mandata u slučajevima iz člana 28. Zakona.
- (2) U slučaju prijevremenog razriješenja dužnosti člana Upravnog odbora, novi član se bira u skladu sa odredbama Zakona i ovog Statuta do isteka mandata člana Upravnog odbora koji je razriješen.
- (3) Član Upravnog odbora koji je podnio ostavku dužan je nastaviti obavljati funkciju člana do razriješenja, a najduže 3 mjeseca od dana podnošenja ostavke.

Odjeljak B. Organ rukovođenja

Član 15.

- (1) Direktor Agencije (u daljem tekstu: direktor) rukovodi radom Agencije, predstavlja Agenciju i odgovoran je za njen rad.
- (2) Zamjenik direktora Agencije (u daljem tekstu: zamjenik direktora) obavlja poslove u skladu sa aktima o unutrašnjoj organizaciji i sistematizaciji poslova, te zamjenjuje direktora u slučaju njegovog odsustva i spriječenosti da obavlja svoju funkciju.
- (3) Direktora i zamjenika direktora, nakon provedenog postupka javnog konkursa, na prijedlog Vlade imenuje Parlament, na mandatni period od 4 godine.
- (4) Za direktora i zamjenika direktora može biti imenovano lice koje ispunjava uslove iz člana 22. Zakona.
- (5) Direktor i zamjenik direktora za svoj rad odgovaraju Upravnom odboru i Parlamentu.
- (6) Odredbe člana 10. stav (4) ovog Statuta primjenjuju se i na direktora i zamjenika direktora.

- (7) Položaj direktora i zamjenika direktora, njihova ovlaštenja, odgovornosti, plaća, materijalna i druga prava utvrđuju se ugovorom između Upravnog odbora i direktora, odnosno zamjenika direktora.

Član 16.

Direktor vrši sljedeće poslove:

- a) izdaje i/ili oduzima dozvole za rad subjektima bankarskog sistema, u skladu sa posebnim propisom kojim se uređuje njihovo poslovanje,
- b) izdaje i/ili oduzima ostale saglasnosti subjektima bankarskog sistema, u skladu sa posebnim propisom kojim se uređuje njihovo poslovanje,
- c) daje prethodnu saglasnost, odnosno saglasnost za imenovanje članova organa upravljanja i rukovođenja subjekata bankarskog sistema, u skladu sa posebnim propisom kojim se uređuje njihovo poslovanje,
- d) poduzima propisane mjere prema subjektima bankarskog sistema, u skladu sa posebnim propisom kojim se uređuje njihovo poslovanje,
- e) predlaže Upravnom odboru provedbene propise i akte iz člana 12. stav (1) tačka d) Statuta,
- f) predlaže Upravnom odboru program rada i finansijski plan poslovanja, kao i druge akte iz njihove nadležnosti,
- g) provodi odluke, zaključke, uputstva i druge akte Upravnog odbora u vezi sa djelatnošću Agencije,
- h) donosi odluke u vezi sa organizacijom i poslovanjem Agencije, koje nisu u nadležnosti Upravnog odbora, te akt o sistematizaciji poslova,
- i) predlaže imenovanje i razrješenje članova Drugostepene komisije, Odbora za superviziju i Odbora za restrukturiranje,
- j) donosi unutrašnje akte Agencije koji nisu u nadležnosti Upravnog odbora;
- k) donosi opće i pojedinačne akte kojima se uređuje rad subjekata bankarskog sistema, koje nisu u nadležnosti Upravnog odbora;
- l) imenuje eksternog upravnika, posebnog upravnika i likvidacijskog upravnika banke i pokreće postupak likvidacije ili stečaja banke,
- m) u vezi sa postupkom restrukturiranja: usvaja plan restrukturiranja, otklanja prepreke za restrukturiranje, vrši otpis i konverziju kapitala, izbor lica koje vrši nezavisnu procjenu vrijednosti imovine i obaveza, pokreće postupak restrukturiranja, primjenjuje instrumente i mjere koje se poduzimaju u restrukturiranju, donosi druge pojedinačne akte u postupku restrukturiranja, u skladu sa posebnim propisom,
- n) zastupa Agenciju u svim poslovnim odnosima, kao i u sudskim postupcima, te potpisuje sve ugovore ispred Agencije,
- o) predstavlja Agenciju na sastancima sa predstavnicima Centralne banke Bosne i Hercegovine (u daljem tekstu: Centralna banka) radi koordinacije u obavljanju djelatnosti Agencije u skladu sa Zakonom i Statutom Agencije,
- p) odlučuje o zapošljavanju i angažovanju lica u Agenciji, u skladu sa Statutom i Pravilnikom o unutrašnjoj organizaciji i Pravilnikom o sistematizaciji radnih mjesta u Agenciji,
- r) donosi odluku o investicijskim ulaganjima do 50.000,00 KM,
- s) donosi odluke o osnivanju stručnih savjeta, odbora, komisija ili drugih radnih tijela za stručnu obradu pojedinih pitanja iz djelokruga Agencije, utvrđuje njihov sastav i određuje zadatke,
- t) obavlja i druge poslove propisane Zakonom, drugim zakonima i Statutom Agencije.

Član 17.

- (1) Direktor može prenijeti na druga lica dio ovlaštenja iz člana 16. ovog Statuta.
- (2) Lica ovlaštena odlukom direktora o prijenosu ovlaštenja za potpisivanje, ne mogu prenositi data ovlaštenja drugim licima.

VI. ZAPOSLENICI I LICA SA POSEBNIM OVLAŠTENJIMA

Član 18.

- (1) Rukovodioci organizacionih jedinica Agencije su zaposlenici sa posebnim ovlaštenjima, koje imenuje i razrješava direktor.
- (2) Pored rukovodilaca organizacionih jedinica Agencije, i to: direktora sektora, rukovodilaca odjela i rukovodilaca službi, zaposlenici sa posebnim ovlaštenjima su i druga lica kojima je, u skladu sa Zakonom, ovim Statutom i općim aktima Agencije, odlukom direktora dodijeljen status zaposlenika sa posebnim ovlaštenjima.
- (3) Zaposlenici sa posebnim ovlaštenjima nadležni su za obavljanje poslova i radnih zadataka utvrđenih Pravilnikom o unutrašnjoj organizaciji i Pravilnikom o sistematizaciji poslova, ugovorima o radu i ovlaštenjima u skladu sa odlukom direktora.
- (4) Zaposlenici sa posebnim ovlaštenjima u okviru svojih nadležnosti i ovlaštenja odgovorni su za zakonitost rada i poslovanja, izvršavanje obaveza, poboljšanje kvaliteta poslovanja i podizanje ugleda Agencije.
- (5) Zaposlenici sa posebnim ovlaštenjima za svoj rad odgovaraju neposrednom rukovodiocu i direktoru Agencije.

Član 19.

- (1) Agencija, direktor, zamjenik direktora i ovlaštena lica u Agenciji, odnosno zaposlenici sa posebnim ovlaštenjima, lica koja je Agencija imenovala za savjetnike, privremene/eksterne upravnike, posebne upravnike ili likvidatore, kao i druga lica koja po rješenju Agencije ili na osnovu zakona u postupku supervizije subjekata bankarskog sistema ili restrukturiranja banke obavljaju dužnosti utvrđene Zakonom, ne odgovaraju za štetu koja nastane prilikom obavljanja dužnosti u primjeni propisa kojima se uređuju subjekti bankarskog sistema, osim ako se u odgovarajućem postupku pred nadležnim organom pravosnažnom odlukom dokaže da su određenu radnju iz koje je nastupila štetna posljedica učinili ili propustili da učine namjerno ili grubom nepažnjom.
- (2) Agencija snosi troškove pravnih postupaka pokrenutih protiv lica iz stava (1) ovog člana za radnje koje su obavili u dobroj vjeri u toku izvršavanja svojih dužnosti u okviru svojih ovlaštenja.
- (3) Lica iz stava (1) ovog člana ne mogu odgovarati za štetu nastalu prilikom obavljanja dužnosti ni nakon prestanka radnog odnosa u Agenciji, odnosno prestanka vršenja dužnosti.
- (4) Ako je u odgovarajućem postupku pravosnažnom odlukom utvrđeno da su lica iz stava (1) ovog člana učinila štetu namjerno ili grubom nepažnjom, Agencija može od navedenih lica tražiti naknadu troškova zastupanja, kao i iznos isplaćene štete, u skladu sa zakonom.

VII. ORGANIZACIJA, NAČIN RADA, DJELOKRUG I ODGOVORNOST ODBORA, KOMISIJA I OMBUDSMENA ZA BANKARSKI SISTEM

Član 20.

- (1) U skladu sa Zakonom u Agenciji se formiraju zasebna tijela i odbori.

- (2) Tijela i odbori iz stava (1) ovog člana formiraju se u cilju provođenja nadležnosti i funkcije Agencije, a to su:
- Komisija za odlučivanje po žalbi protiv prvostepenih akata Agencije (Drugostepena komisija),
 - Odbor za superviziju,
 - Odbor za restrukturiranje i
 - Ombudsmen za bankarski sistem.

Odjeljak A. Drugostepena komisija

Član 21.

- Upravni odbor na prijedlog direktora Agencije imenuje pet članova Drugostepene komisije, na mandatni period od 4 godine, sa mogućnošću ponovnog imenovanja.
- Predsjednika i zamjenika predsjednika Drugostepene komisije iz sastava iz stava (1) ovog člana imenuje Upravni odbor.
- Upravni odbor na prijedlog direktora imenuje i tri zamjenska člana Drugostepene komisije, koji mijenjaju stalne članove u slučaju njihove spriječenosti da učestvuju u radu Drugostepene komisije.
- U slučaju potrebe za zamjenskim članovima u radu Drugostepene komisije, iste određuje predsjednik, odnosno zamjenik predsjednika Drugostepene komisije.

Član 22.

- Drugostepena komisija nadležna je za donošenje odluka po žalbi na prvostepene akte Agencije koji se odnose na poslovanje subjekata bankarskog sistema.
- Drugostepeni postupak protiv akata Agencije, kao i način rada Drugostepene komisije uređuje se Pravilnikom o radu Drugostepene komisije koji donosi Upravni odbor.
- U postupku odlučivanja po žalbi na akte Agencije, Drugostepena komisija dužna je donijeti odluku u roku od 15 dana od dana uredno izjavljene žalbe sa dostavljenom potpunom dokumentacijom.
- Odluka iz prethodnog stava je konačna, protiv koje se ne može voditi upravni spor.
- Odlučivanje u pojedinačnom predmetu, Drugostepena komisija vrši u sastavu iz člana 21. stav (1) ovog Statuta.
- Drugostepena komisija donosi odluke iz svoje nadležnosti većinom glasova od ukupnog broja članova iz člana 21. stav (1) ovog Statuta.

Član 23.

Za člana Drugostepene komisije može biti imenovano lice koje:

- je državljanin Bosne i Hercegovine,
- ima najmanje visoku stručnu spremu VII stepen stručne spreme, odnosno, visoko obrazovanje prvog ciklusa Bolonjskog sistema studiranja (koji se vrednuje sa 240 ECTS bodova) pravne ili ekonomske struke,
- ima visoke moralne kvalitete, sa dugogodišnjim radnim iskustvom, a najmanje 5 godina iz oblasti upravnog postupka, upravnog nadzora, te uskim specijalnostima, znanjima i vještinama u oblasti bankarstva, računovodstva i finansija,
- nije osuđivano za krivična djela iz oblasti finansija, tržišta kapitala, pranja novca i finansiranja terorističkih aktivnosti i kojem nije pravosnažnom presudom zabranjeno vršenje aktivnosti iz nadležnosti Agencije i oblasti finansija,
- nije zaposlenik niti član organa Agencije, niti subjekta bankarskog sistema nad kojim Agencija vrši nadzor.

Član 24.

- (1) Članovi Drugostepene komisije imaju pravo na naknadu u zavisnosti od učešća u radu Drugostepene komisije.
- (2) Visinu naknade članovima Drugostepene komisije određuje Upravni odbor.

Odjeljak B. Odbor za superviziju

Član 25.

- (1) Odbor za superviziju je savjetodavno tijelo direktora Agencije u oblasti supervizije subjekata bankarskog sistema, koje se sastoji od stalnih, zamjenskih i povremenih članova.
- (2) Stalni članovi Odbora za superviziju su pomoćnik direktora za superviziju banaka, pomoćnik direktora za pravnu podršku i licenciranje i savjetnik kojeg na prijedlog direktora imenuje Upravni odbor.
- (3) Upravni odbor na prijedlog direktora imenuje i zamjenske članove, koji mijenjaju stalne članove u slučaju njihove odsutnosti.
- (4) Povremeni članovi Odbora za superviziju su rukovodioci unutrašnjih organizacionih jedinica bez prava glasa, koji su prisutni sjednici kada se raspravlja o predmetima iz njihove nadležnosti.
- (5) Sjednicama Odbora za superviziju obavezno prisustvuju direktor Agencije i zamjenik direktora, kao i druga stručna lica po pozivu u zavisnosti od pitanja koja se razmatraju na sjednici, bez prava glasa.

Član 26.

U okviru svojih nadležnosti, Odbor za superviziju utvrđuje:

- a) prijedloge akata za izdavanje i/ili oduzimanje dozvole za rad subjektima bankarskog sistema, u skladu sa posebnim propisom kojim se uređuje njihovo poslovanje i aktima Agencije,
- b) prijedloge akata za izdavanje i/ili oduzimanje ostalih saglasnosti subjektima bankarskog sistema, u skladu sa posebnim propisom kojim se uređuje njihovo poslovanje i aktima Agencije,
- c) prijedloge akata kojim se daje/oduzima prethodna saglasnost, odnosno saglasnost za imenovanje članova organa upravljanja i rukovođenja subjekata bankarskog sistema, u skladu sa posebnim propisom kojim se uređuje njihovo poslovanje,
- d) prijedlog za poduzimanje propisane mjere prema subjektima bankarskog sistema, u skladu sa posebnim propisom kojim se uređuje njihovo poslovanje,
- e) nacрте provedbenih propisa i akata iz člana 12. stav (1) tačka d) Statuta,
- f) prijedlog općih i pojedinačnih akata kojima se uređuje rad subjekata bankarskog sistema, koje su u nadležnosti direktora,
- g) prijedlog za imenovanje savjetnika i eksternog upravnika, kao i prijedlog za pokretanje postupka likvidacije banke i imenovanje likvidacijskog upravnika, te prijedlog direktoru podnošenja zahtjeva za pokretanje postupka stečaja banke pred nadležnim sudom.

Član 27.

- (1) Odbor za superviziju raspravlja i utvrđuje prijedloge iz člana 26. ovog Statuta većinom glasova od ukupnog broja članova sa pravom glasa.
- (2) U radu Odbora za superviziju i pravovaljano odlučivanje na sjednici može učestvovati najviše jedan zamjenski član.
- (3) Sjednice Odbora za superviziju održavaju se po potrebi, a najmanje jednom mjesečno.

- (4) Odbor za superviziju donosi Poslovnik o svom radu, kojim se uređuje način rada, vrste akata iz nadležnosti Odbora za superviziju i način glasanja na sjednici.

Odjeljak C. Odbor za restrukturiranje

Član 28.

- (1) Odbor za restrukturiranje je savjetodavno tijelo direktora Agencije u oblasti restrukturiranja, koje se sastoji od stalnih i zamjenskih članova.
- (2) Stalni članovi Odbora za restrukturiranje su rukovodilac organizacione jedinice za restrukturiranje, pomoćnik direktora za pravnu podršku i licenciranje i savjetnik kojeg na prijedlog direktora imenuje Upravni odbor.
- (3) Upravni odbor na prijedlog direktora imenuje i zamjenske članove, koji mijenjaju stalne članove u slučaju njihove odsutnosti.
- (4) Sjednicama Odbora za restrukturiranje obavezno prisustvuju direktor Agencije i zamjenik direktora, kao i druga stručna lica po pozivu u zavisnosti od pitanja koja se razmatraju na sjednici, bez prava glasa.

Član 29.

U okviru svojih nadležnosti, Odbor za restrukturiranje utvrđuje prijedloge:

- a) za pokretanje postupka likvidacije ili stečaja banke u slučaju kada se isti pokreće kao posljedica pokrenutog ili provedenog postupka restrukturiranja,
- b) za imenovanje posebnog upravnika i likvidacijskog upravnika banke,
- c) plana restrukturiranja,
- d) akta za otklanjanje prepreka za restrukturiranje,
- e) akta za otpis i konverziju kapitala,
- f) za izbor lica koje vrši nezavisnu procjenu vrijednosti imovine i obaveza,
- g) za pokretanje postupka restrukturiranja i primjenu instrumenata i mjera koje se poduzimaju u restrukturiranju,
- h) za donošenje drugih pojedinačnih akata u postupku restrukturiranja, u skladu sa posebnim propisom.

Član 30.

- (1) Odbor za restrukturiranje raspravlja i utvrđuje prijedloge iz člana 29. ovog Statuta većinom glasova od ukupnog broja članova sa pravom glasa.
- (2) U radu Odbora za restrukturiranje i pravovaljano odlučivanje na sjednici može učestvovati najviše jedan zamjenski član.
- (3) Sjednice Odbora za restrukturiranje održavaju se po potrebi, a najmanje jednom u tri mjeseca.
- (4) Odbor za restrukturiranje donosi Poslovnik o svom radu, kojim se uređuje način rada, vrste akata iz nadležnosti Odbora za restrukturiranje i način glasanja na sjednici.

Odjeljak D. Ombudsmen za bankarski sistem

Član 31.

- (1) U sastavu Agencije uspostavlja se samostalna organizaciona jedinica unutar koje djeluje jedan ili više Ombudsmena za bankarski sistem, sa ciljem promoviranja i zaštite prava i interesa fizičkih lica kao korisnika finansijskih usluga.
- (2) Organizacionom jedinicom rukovodi Ombudsmen, kojeg imenuje i razrješava Upravni odbor, a radno – pravni status i druga prava iz radnog odnosa Ombudsmena ostvaruju se u Agenciji.

- (3) Ombudsmen je zaposlenik Agencije koji je nezavisan u obavljanju svojih zadataka i ne djeluje kao zastupnik Agencije.

Član 32.

- (1) Ombudsmen vrši sljedeće poslove:
- a) pruža informacije o pravima i obavezama korisnika i davaoca finansijskih usluga,
 - b) prati i predlaže aktivnosti za unapređenje odnosa između korisnika finansijskih usluga i finansijskih organizacija bankarskog sistema Federacije BiH,
 - c) istražuje aktivnosti na finansijskom tržištu po službenoj dužnosti ili na osnovu prigovora, radi zaštite prava korisnika finansijskih usluga,
 - d) razmatra prigovore korisnika finansijskih usluga, daje odgovore, preporuke i mišljenja, te predlaže mjere za rješavanje prigovora,
 - e) posreduje u mirnom rješavanju spornih odnosa između korisnika finansijskih usluga i finansijskih organizacija bankarskog sistema Federacije BiH,
 - f) izdaje smjernice ili preporuke o posebnim standardnim uslovima ili aktivnostima za primjenu dobrih poslovnih običaja u poslovanju finansijskih organizacija bankarskog sistema Federacije BiH, te predlaže Upravnom odboru donošenje akata iz njegove nadležnosti u oblasti zaštite prava korisnika finansijskih usluga,
 - g) saraduje sa nadležnim pravosudnim, upravnim i drugim organima i organizacijama, kao i sa nadzornim i kontrolnim institucijama u zemlji i inostranstvu, u okviru svoje nadležnosti,
 - h) saraduje sa ostalim organima i subjektima nadležnim za zaštitu prava korisnika i
 - i) poduzima druge radnje iz oblasti zaštite prava korisnika finansijskih usluga.
- (2) Upravni odbor donosi opće akte kojima se uređuje pitanje imenovanja i razrješenja Ombudsmena, kao i uslovi i način postupanja po prigovorima korisnika finansijskih usluga, te način izvještavanja i druga pitanja od značaja, u okviru odredaba čl. 33., 34. i 36. Zakona.

VIII. SREDSTVA, PRIHODI I RASHODI AGENCIJE

Član 33.

- (1) Sredstva za rad Agencije osiguravaju se iz naknada za izdavanje dozvola za rad subjekata bankarskog sistema, naknada koje subjekti bankarskog sistema izdvajaju za superviziju svog poslovanja i naknada za obavljanje drugih poslova iz djelokruga Agencije.
- (2) Višak prihoda nad rashodima tekuće godine prenosi se u narednu godinu.

Član 34.

Iz sredstava Agencije pokrivaju se obaveze Agencije, te sredstva za nabavku sredstava rada i poslovanja, plaće zaposlenika Agencije i druge troškove u skladu sa Zakonom, ostalim propisima Federacije Bosne i Hercegovine i aktima Agencije.

Član 35.

- (1) Za pokriće rizika nastalih poslovanjem u obavljanju djelatnosti Agencije kao i za pokriće nedostataka prihoda u odnosu na ostvarene rashode, Agencija ima sredstva posebne rezerve.
- (2) Sredstva posebne rezerve Agencija izdvaja iz sredstava prihoda Agencije u visini koju na prijedlog direktora Agencije odredi Upravni odbor.
- (3) Odluku o upotrebi sredstava posebnih rezervi donosi Upravni odbor na prijedlog direktora Agencije.

IX. PLANIRANJE I IZVJEŠTAVANJE

Član 36.

- (1) Program rada i finansijski plan Agencije donosi Upravni odbor, do kraja tekuće godine za narednu godinu.
- (2) Izvještaj o poslovanju Agencije za prethodnu godinu, sa mišljenjem nezavisnog eksternog revizora o finansijskim izvještajima, usvaja Upravni odbor i dostavlja Parlamentu putem Vlade, u roku od 6 (šest) mjeseci od kraja izvještajne godine.

X. SISTEM INTERNIH KONTROLA

Član 37.

- (1) Sistem internih kontrola u Agenciji je proces kojim se uspostavljaju i provode detaljne procedure i postupci vezani za sveobuhvatni sistem praćenja i provjera izvršavanja poslovnih aktivnosti na svim poslovnim nivoima i područjima poslovanja Agencije, koji provode Upravni odbor, direktor i zamjenik direktora, odbori, tijela i komisije i zaposlenici Agencije na svim nivoima, kao trajnu aktivnost u poslovanju Agencije.
- (2) Putem sistema internih kontrola osigurava se rad i postupanje svih zaposlenika u skladu sa važećim propisima i aktima Agencije kroz praćenje i kontrolu obavljanja poslovnih aktivnosti u svim segmentima poslovanja Agencije.

Član 38.

- (1) Sistem internih kontrola prvenstveno obuhvata administrativno, računovodstveno i finansijsko poslovanje Agencije, uključujući posebnu kontrolu finansijskog plana i planiranja, standardnih i nestandardnih troškova, statističkih analiza, periodičnih operativnih i poslovnih izvještaja i ima usku vezu sa internom revizijom.
- (2) Za uspostavu, funkcionisanje i unapređenje sistema internih kontrola u Agenciji odgovoran je Upravni odbor, koji je dužan osigurati kroz akte iz svoje nadležnosti adekvatan sistem internih kontrola.
- (3) Uslove za provođenje sistema internih kontrola dužan je osigurati direktor i zamjenik direktora, kroz omogućavanje praćenja i pregleda donesenih programa, planova, politika i procedura, odnosno njihovo provođenje.

XI. INTERNA I EKSTERNA REVIZIJA

Odjeljak A. Interna revizija

Član 39.

Agencija uspostavlja organizacionu jedinicu interne revizije (u daljem tekstu: interna revizija) kojom rukovodi glavni interni revizor (u daljem tekstu: Glavni interni revizor), kojeg imenuje direktor u skladu sa internim aktima Agencije.

Član 40.

- (1) Interna revizija vrši ocjenu adekvatnosti, efikasnosti i uspješnosti sistema internih kontrola i informiše direktora i Upravni odbor o provođenju tog sistema i daje prijedloge za njegovo unapređenje.

- (2) Pravilnikom o internoj reviziji Agencije, koji donosi Upravni odbor, detaljnije se uređuje uspostavljanje i organizacija funkcije interne revizije, cilj i nadležnost interne revizije, odnos interne revizije i ostalih funkcija u Agenciji, principi i procedure interne revizije, prava i obaveze u funkcionisanju interne revizije u Agenciji i uslovi za obavljanje poslova interne revizije.

Član 41.

Glavni interni revizor je dužan, odnosno odgovoran je za:

- a) identifikaciju, praćenje i ocjenu rizika u poslovanju Agencije,
- b) provjeru da li je u Agenciji uspostavljen adekvatan sistem internih kontrola,
- c) praćenje usklađenosti poslovanja Agencije sa važećim propisima i općim aktima Agencije,
- d) sačinjavanje prijedloga godišnjeg programa rada interne revizije, koji usvaja Upravni odbor,
- e) provođenje usvojenog godišnjeg programa rada interne revizije,
- f) provođenje posebne revizije i zadataka konsultantske prirode, koji se odnose na internu reviziju, a nisu obuhvaćeni godišnjim planom interne revizije,
- g) dostavljanje izvještaja o provedenoj reviziji rada pojedinih organizacionih jedinica Agencije i pojedinih segmenata poslovanja organizacionih jedinica koji su predmet revizije, direktoru, zamjeniku direktora i Upravom odboru,
- h) poslove interne revizije u skladu sa zakonom, međunarodnim računovodstvenim standardima, međunarodnim standardima finansijskog izvještavanja i međunarodnim revizorskim standardima, drugim propisima i općim aktima Agencije.

Odjeljak B. Eksterna revizija

Član 42.

Upravni odbor imenuje nezavisnog eksternog revizora, koji je dužan sačiniti i dostaviti organima upravljanja i rukovođenja Agencije, izvještaj o izvršenoj reviziji godišnjih finansijskih izvještaja i izraziti mišljenje o tome da li finansijski izvještaji istinito i objektivno prikazuju po svim materijalno značajnim pitanjima finansijsko stanje i rezultate poslovanja Agencije, u godišnjem obračunskom periodu na koji se odnosi revidirani finansijski izvještaj, kao i da li su izvještaji sastavljeni u skladu sa Međunarodnim računovodstvenim standardima (MRS) odnosno Međunarodnim standardima finansijskog izvještavanja (MSFI).

XII. POSLOVNA TAJNA

Član 43.

- (1) Poslovnu tajnu čine dokumenti, podaci i povjerljive informacije koji su Zakonom propisani kao poslovna tajna, kao i drugim propisima i internim aktima Agencije, koje donosi Upravni odbor Agencije.
- (2) Sa poslovnom tajnom iz stava (1) ovog člana postupa se na način propisan Zakonom i internim aktom koji donosi Upravni odbor.

Član 44.

Članovi Upravnog odbora, direktor, zamjenik direktora, zaposlenici, revizori i druga lica koja rade ili koja su radila za ili u ime Agencije dužna su čuvati poslovnu tajnu Agencije na način propisan Zakonom i općim aktima Agencije.

XIII. SARADNJA

Član 45.

(1) U ostvarivanju svog cilja i nadležnosti, Agencija samostalno ili u saradnji sa Centralnom bankom saraduje sa nadležnim organima Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine, te u okvirima svoje nadležnosti poduzima mjere za unaprjeđenje te saradnje u skladu sa Zakonom i zakonima kojima se uređuje rad subjekata bankarskog sistema.

(2) Radi unapređenja funkcije supervizije, kontrole i nadzora subjekata bankarskog sistema Federacije Bosne i Hercegovine, Agencija saraduje sa nadležnim međunarodnim organima i institucijama, te tijelima nadležnim za superviziju u drugim državama. Ove organe i institucije obuhvataju naročito: Međunarodni monetarni fond i Svjetska banka, Odbor za finansijsku stabilnost u Bazelu (koordinator međunarodnih i nacionalnih donosioca standarda za finansijski sektor), Bazelski komitet za superviziju banaka i njegov Institut za finansijsku stabilnost, Regionalne grupe supervizora pri Bazelskom komitetu, Evropska centralna banka, Evropske supervizorske institucije za bankarstvo, vrijednosne papire i osiguranje: EBA, ESMA i EIOPA, nacionalni organi stranih država za superviziju banaka, itd.

(3) Radi izvršavanja nadležnosti za restrukturiranje banaka, odnosno člana bankarske grupe, Agencija saraduje sa Centralnom bankom, Federalnim ministarstvom finansija, Agencijom za osiguranje depozita u Bosni i Hercegovini, Agencijom za bankarstvo Republike Srpske, kao i sa drugim nadzornim organima finansijskog sektora Federacije Bosne i Hercegovine i Republike Srpske, sa stranim tijelima nadležnim za restrukturiranje finansijskih institucija i nadzor u oblasti finansijskog poslovanja, te drugim nadležnim tijelima. Strana tijela za restrukturiranje finansijskih institucija mogu da obuhvate institucije navedene u stavu (2) ovog člana kao i EU Jedinostveni mehanizam za rezoluciju banaka (SRM) i Jedinostveni odbor za rezoluciju banaka (SRB), nacionalni organi stranih država za restrukturiranje banaka, itd.

(4) Agencija može u okviru svoje nadležnosti, u skladu sa Zakonom i zakonima kojima se uređuje rad subjekata bankarskog sistema, zaključivati sporazume kojima se uređuje razmjena informacija i podataka sa drugim nadležnim regulatornim organima, institucijama i tijelima iz ovog člana.

XIV. AKTI AGENCIJE

Član 46.

(1) Agencija donosi unutrašnje akte kojima se uređuje organizacija i poslovanje Agencije, te opće i pojedinačne akte kojim uređuje rad subjekata bankarskog sistema.

(2) Opći akti kojima se uređuje organizacija i poslovanje Agencije objavljuju se na oglasnoj ploči Agencije.

Član 47.

(1) Opći akti kojima se uređuje rad subjekata bankarskog sistema, koje donosi Agencija u skladu sa Zakonom, kao i aktivnosti i postupanje Agencije u primjeni svojih zakonom propisanih ovlaštenja zasnivaju se na Osnovnim principima za efikasnu superviziju banaka i standardima koje utvrđuje Bazelski komitet za superviziju banaka i primjenjivim direktivama Evropske unije zasnovanim na tim principima i standardima.

(2) Opći akti iz stava (1) ovog člana objavljuju se u "Službenim novinama Federacije BiH".

Član 48.

Izmjena i dopuna Statuta, kao i unutrašnjih općih akata vrši se na način i po postupku njihovog donošenja.

XV. PRIJELAZNE I ZAVRŠNE ODREDBE

Član 49.

Tumačenje odredbi Statuta daje Upravni odbor Agencije.

Član 50.

Agencija će uskladiti svoje unutrašnje akte u roku tri mjeseca od dana stupanja na snagu ovog Statuta.

Član 51.

Danom stupanja na snagu ovog Statuta prestaje da važi Statut Agencije za bankarstvo Federacije Bosne i Hercegovine, broj: 01-1-2159-2/03 od 09.12.2003. godine ("Službene novine Federacije BiH", broj: 42/04).

Član 52.

Statut stupa na snagu danom dobijanja saglasnosti Vlade, a objavljuje se u "Službenim novinama Federacije BiH".

Broj: U.O.-14-01/17
Sarajevo, 27.12.2017. godine

PREDSJEDNICA
UPRAVNOG ODBORA

mr. sc. Ljerka Marić, dipl. ecc., s.r.